

gustav / January 27, 2013 09:41PM

[道教諸仙列聖寶誥](#)

道教諸仙列聖寶誥

一、三清總誥

志心皈命禮

天寶靈寶神寶 玉清上清太清 一氣流行 三尊應化 含光寂寂 不言而行佈四時 正色空空 無為而化生三界 大羅天上
太極宮中 虛無妙道
三清三境三寶大天尊

二、玉清寶誥

志心皈命禮

三界之上 梵炁彌羅 上極無上 天中之天 鬱羅蕭臺 玉山上京 渺渺金闕 森羅淨泓 玄元始炁 混沌之先 寶珠之中
玄之又玄 開明三境 化生諸天 億萬天真 無鞅聖眾 旋斗歷箕 回度五常 巍巍大範 萬道之宗 大羅玉清 虛無自然
至真妙道
元始天尊

三、上清寶誥

志心皈命禮

居上清境 號靈寶君 祖劫化生 九萬九千餘梵炁 赤書煥發 六百六十八真文 因混沌赤文而開九霄 紀元洞玉曆而分五劫
天經地緯 巍乎造化之宗 樞陰機陽 卓爾雷霆之祖 大悲大願 大聖大慈 玉宸道君
靈寶天尊

四、太清寶誥

志心皈命禮

隨方設教 歷劫度人 為皇者師 帝者師 王者師 假名易號 立天之道 地之道 人之道 隱聖顯凡 總千二百之官君
包萬億重之梵炁 化行今古 著道德凡五千言 主握陰陽 命雷霆用九五數 大悲大願 大聖大慈 太上老君
道德天尊

五、玉皇寶誥

志心皈命禮

太上彌羅無上天 妙有玄真境 渺渺紫金闕 太微玉清宮 無極無上聖 廓落豁光明 寂寂浩無宗 玄範總十方 湛寂真常道
恢漠大神通
玉皇大天尊玄穹高上帝

六、三官寶誥

志心皈命禮

唯三聖人 乃一太極 晉受浩劫家之命 鼎膺無量品之褒 紫微清虛洞陰 總領功過 賜福赦罪解厄 普濟存亡 道冠諸天
恩覃三界 大悲大願 大聖大慈 天地水府
三元三品三官大帝三宮九府應感天尊

七、普化寶誥

志心皈命禮

九天應元府 無上玉清王 化形而滿十方 談道而跌九鳳 三十六天之上 閱寶笈考瓊書 千五百劫之先 位上真權大化
手舉金光如意 宣說玉樞寶經 不順化作微塵 發號疾如風火 以清靜心而宏大願 以智慧力而伏諸魔 總司五雷 運心三界
群生父 萬靈師 大聖大慈 至皇至道
九天應元雷聲普化天尊

八、太乙寶誥

志心皈命禮

青華長樂界 東極妙嚴宮 七寶芳鸞林 九色蓮花座 萬真環拱內 百億瑞光中 玉清靈寶尊 應化玄元始 浩劫垂慈濟
大千甘露門 妙道真身 紫金瑞相 隨機赴感 誓願無邊 大聖大慈 大悲大願 十方化號 普度眾生 億億劫中 度人無量
尋聲赴感
太乙救苦天尊青玄九陽上帝

九、玄帝寶誥

志心皈命禮

混元六天 傳法教主 修真悟道 濟度群迷 普惠眾生 消除災障 八十二化 三教祖師 大慈大悲 救苦救難 三元都總管
九天遊奕使 左天罡 北極右垣大將軍 鎮天助順 真武靈應 福德衍慶 仁慈正烈 協運真君 治世福神 玉虛師相 玄天上帝
金闕化身蕩魔天尊

十、祖天師寶誥

志心皈命禮

本來南土 上泝蜀都 先獲黃帝九鼎之丹書 後事老君兩度於玉局 千軸得修真之要 一時成吐納之功 法籙全成
受盟威品而結璘珠 正邪兩辨 奪福庭治而化鹹泉 德就大丹 道齊七政 大悲大願 大聖大慈 三天扶教 輔元體道 大法天師
雷霆都省 泰玄上相 都天大法主 正一冲玄神化 靜應顯佑真君 六合無窮 高明大帝
降魔護道天尊

十一、呂祖寶誥

志心皈命禮

玉清內相 金闕選仙 化身為三教之師 掌法判五雷之令 黃梁夢覺 忘世上之功名 寶劍光芒 掃人間之妖氣 四生六道
有感必孚 三界十方 無求不應 黃鶴樓前留勝蹟 終南山上煉丹砂 存道範於斯文 顯仙蹤於雲洞 大悲大願 大聖大慈
開山啟教 靈應祖師 天雷上相 靈寶真人 純陽演正 變元贊運 保惠翊化警化 孚佑帝君
興行妙道天尊

十二、關聖寶誥

志心皈命禮

太上神威 英文雄武 精忠大義 高節清廉 協運皇圖 德崇演正 掌儒道釋教之權 管天地人才之柄 上司三十六天 星辰雲漢
下轄七十二地 冥壘幽巖 秉注人生功德 延壽丹書 執定生死罪過 奪命黑籍 考察諸佛諸神 監制群仙群職 德圓妙果
無量度人 萬靈萬聖 至上至尊 忠孝祖師 伏魔大帝 關聖帝君 大悲大願 大聖大慈 南天主宰 玉帝殿前首相 執掌雷部
真元顯應
昭明翊漢天尊

十三、司命寶誥

志心皈命禮

一家之主 五祀之神 司喉舌於北斗之中 察善惡於東廚之內 賜福赦罪 移凶化吉 安鎮陰陽 保佑家庭 何災不滅 何福不增
有求必應 無感不通 火德澤民賴以生 上調飲食奉雙親 下煮饘餐滋壽命 丹天世界 灶府眾神 欲酬護佑猶未能
普具香燈伸寸敬 虔誠懇禱 宥過愆迕 弟子稽首謝洪恩 願保門庭多吉慶 大悲大願 大聖大慈 赤皇上品 三炁火官
洞陽大帝 元皇定國 南丹紀壽 護宅天尊
玉清輔相九天東廚司命灶王真君

十四、文帝寶誥

志心皈命禮

不驕樂境 玉真慶宮 現九十八化之行藏 顯億千萬種之神異 飛鸞開化於在在 如意救劫於生生 至孝至仁 功存乎道儒釋教
不驕不樂 職盡乎天地水官 功德難量 威靈莫測 大悲大願 大聖大慈 九天輔元 開化主宰 司祿職貢真君 七曲靈應
保德宏仁大帝 談經演教 消劫行化
更生永命天尊

十五、康元帥寶誥

志心皈命禮

真武帝君部下天尊 康大元帥 赤面朱脣 眉分八彩 威儀諄諄 五龍長鬚 勇健超群 神光氣慨 遊巡乾坤 手執金鋼 搜捉邪氛
治妖擒怪 監察人倫 護佑善士 法佑帝君 正直無私 惟佑善門 大悲大願 大聖大慈 北極玄天上帝左部康大元帥顯赫天尊

十六、趙元帥寶誥

志心皈命禮

北極猛將 右部天尊大元帥 黑面丹脣 仁慈濟眾 德佈乾坤 義雨宏施 罰逆惡倫 英雄柄冠 杵伏魔氛 神目如電 法視善門
照護九州 輔佐上帝 威鎮玄門 檢舉人世 常佑國君 鑒視男女 三綱五倫 誠心朗誦 桂子蘭孫 大悲大願 大聖大慈
救苦消災 北極玄天上帝右部趙大元帥萬靈天尊

十七、馬天君寶誥

志心皈命禮

九天揚化樞機共凜 十分普濟 海內施恩 火德澤民 司權喉舌 仁慈濟世 導化人心 至廉至節 命派五祀 宏德宏仁 司管一家 積功勳操持灶府 著善德輔佐東廚 惠澤群生 移凶化吉 愛惜兆民 赦過消愆 大悲大願 真君內相 廣濟真人 大忠大孝 下凡監堂專理鸞務馬天君

十八、柳真君寶誥

志心皈命禮

練化靈心 道學無量 修為見性 功勳有就 色空色相 塵緣盡脫 即神即仙 凡俗登天 飛鸞降世 勸忠勸孝 監堂闡教 戒惡戒淫 被化多方 回頭有術 宣明義理 妙奧無邊 令人忠孝 褒忠貶昧 醒世節廉 排難解紛 至仁至德 悲憫蒼生 切念下民 大願大慈 南宮輔佐 開堂濟世 孚佑薦前 協造善文 柳星君妙道真人 加陞太乙天君

十九、廖天君寶誥

志心皈命禮

大漢監軍 忠義上將 英勇威神 有智有略 無欺無險 至孝至仁 心存濟世 意切飛鸞 統理南天佐部 受命玉帝揮毫 積功勳兼掌雷 著善果宣化人間 管諸魔鬼 協眾陰兵 慈悲保赤 惠惜孱民 斬妖護國 治怪安民 廖將軍 南天真相 奉旨馳騁 玉封博施真人 加陞道德天君

二十、王天君寶誥

志心皈命禮

先天主將 一氣神君 都天糾察大靈官 三界無私猛烈將 金睛硃髮 號三五火車雷公 鳳嘴銀牙 統百萬貔貅神將 飛騰雲霧 號令雷霆 降雨開晴 驅邪治病 觀過錯於一十二年 受命玉帝 積功勳於百千萬種 誓佐祖師 至剛至勇 濟死濟生 方方闡教 處處開壇 赤心忠良 斬妖護法王天君 太乙雷聲應化天尊

二十一、張仙寶誥

志心皈命禮

桂香內殿 文昌左宮 七十二化之法身 百千萬劫之運數 育嗣天下 演教人間 金彈竹弓隨身帶 孤辰寡宿滅形蹤 扶小子而衛通關 蔭閨房而護產難 聰明日益 痘疹減消 難育者祈之便育 難痊者禱之必痊 大悲大願 大聖大慈 九天輔元開化靈應張仙大帝七曲毓聖天尊

二十二、周將軍寶誥

志心皈命禮

扶天勇將 察地猛神 鐵鬚銀齒 黑面朱脣 精忠特立 勁節驚人 稽查善惡 糾察凡塵 冥冥顯赫 處處遊巡 鋤奸除惡 救世憂民 忠臣義士 扶彼超昇 乖兒逆子 不勝怒瞋 維持世教 匡正人倫 斬妖護法 大道長存 最靈真宰 最顯神君 護朝護國 剛正忠勇天尊

二十三、關太子寶誥

志心皈命禮

靈侯太子 文經武緯 匡王護國 德義巍巍 忠孝節義 全受全歸 奇勳早建於西蜀 異略素著於北魏 大忠大孝 至仁至勇 補造化之不足 佐聖帝以立功 護朝護國 盡忠盡孝 九天威靈顯化天尊

二十四、趙真君寶誥

志心皈命禮

元明俊哲 首振綱常 繼成都之世胄 振仁里之書香 熟春秋於胸略 穰詩禮乎王章 無心仕路 遯跡山中 學巢由之避世 卻徵璧而弗從 清齋自持 道義為衷 修全真三花聚頂 崇正氣復本從容 享遐齡於壽考 賦觀化之詩章 至廉至介 孝友謙恭 助大道啟無私之化 端士俗匡王佐之隆 宏慈宏願 濟度無疆 南宮輔佐顯化真君

二十五、文宣王寶誥

志心皈命禮

昔降生於周末 應禱尼靈 今主宰於皇朝 維持聖教 德參太極 道集大成 為百世之儒師 作生民之教主 母固母必 母我母人 刪詩定書 繫易執禮 在在應春秋之化 方方持孝義 之經 大悲大願 大聖大慈 至聖先師大成夫子興儒治世天尊

二十六、魁星寶誥

志心皈命禮

魁罡正氣 奎壁元精 兩極萃華 五行秉德 匡扶文運 居二十八宿之微垣 考核士流 察三萬六千之善行 緣損德而空中糊眼 憑陰功而暗裡點頭 開愚性以聰明 啟迷心以穎悟 廣布孝友文章之化 襄贊功名祿秩之權 文武場中 春秋闡內 鼓筆飛鸞而煥彩 剃髻釋褐以梯榮 判金榜於七曲天宮 衡玉籍於桂香寶殿 大悲大願 大仁大威 錫慧通靈 扶文助道 東方木宿大成魁斗帝君

二十七、朱衣寶誥

志心皈命禮

碧霄帝境 黃老真元 顯化紫雲岩 司權丹桂府 身披繡紋 純朱增日月之輝 手捧瑤函 至正掌士流之籍 操玉洞之玄文 勳高鼎祿 判金門之天榜 氣貫雲霄 黃冠炯炯 白髮皤皤 助教飛鸞 奉持如意 至孝至仁 大悲大願 紫微桂府 七曲天宮 文場司命 考功察過 無私掌錄 朱衣丈人 慈悲廣濟真君丹元福順天尊

二十八、天官寶誥

志心皈命禮

玄都元陽 紫微宮中 部三十六曹 偕九千萬眾 考較大千世界之內 錄籍十方國土之中 福被萬靈 主眾生善惡之籍 恩覃三界 致諸仙升降之司 除無妄之災 解釋宿殃 脫生死之趣 救拔幽苦 群生是賴 蠢動咸康 大悲大願 大聖大慈 上元九炁賜福天官曜靈元陽大帝紫微帝君

二十九、地官寶誥

志心皈命禮

青靈洞陽 北都宮中 部四十二曹 偕九千萬眾 主管三界十方九地 掌握五嶽八極四維 吐納陰陽 覈男女善惡青黑之籍 慈育天地 考眾生錄籍禍福之名 法源浩大而能離九幽 浩劫垂光而能消萬罪 群生父母 存沒沾恩 大悲大願 大聖大慈 中元七炁赦罪地官洞靈清虛大帝清靈帝君

三十、水官寶誥

志心皈命禮

陽谷洞元 青華宮中 部四十二曹 偕九千萬眾 掌管江河水帝萬靈之事 水災大會劫數之期 正一法王 掌長夜死魂鬼神之籍 無為教主 錄眾生功過罪福之由 上解天災 度業滿之靈 下濟幽局 分人鬼之道 存亡皆泰 力濟無窮 大悲大願 大聖大慈 下元五炁解厄水官金靈洞陰大帝暘谷帝君

三十一、火官寶誥

志心皈命禮

乾元四品 考較火官 運扶乾健 德合離明 居太陽丹天之中 統左府注生之籍 盛德在火 炎帝持衡 功參佐於三元 炁運行於四月 駕赤龍而行南陸 照明熒惑之宮 燭朱陵而顯丹臺 煥赫文昌之運 輝輝朗耀 炳炳照臨 大悲大願 大聖大慈 赤皇上品 三炁火官炎帝真君洞陽大帝南丹紀壽天尊

三十二、北斗寶誥

志心皈命禮

開明三景 迴度五常 為造化之樞機 為人神之主宰 宣威三界 統御萬靈 判人間善惡之期 司陰府是非之目 能解一切罪 攝伏諸魔精 大悲大願 大聖大慈 中天大聖 北斗九皇賜福星君

三十三、南斗寶誥

志心皈命禮

太微正曜 南極都曹 主司陽官 宰御火帝 位離宮而名符日曜 隨斗柄而環應七元 助天地豐育之功 體道德光明之照 受性降神 握品物生成之統紀 陶魂鑄魄 管人天遷化之樞機 注秩消災 延齡溥福 至聖至尊 大悲大願 中天大聖 南斗六司延壽星君 壽星大帝陽明普度天尊

三十四、東斗寶誥

志心皈命禮

功參紫極 奎耀文昌 司靈象於九霄 御分垣於二曜 青陽舒澤 環河漢之玄流 玉軸宣機 佐雷霆之朕兆 主昭明而電繞虹飛 推應化而歲精宿昴 拱之吉昌 尊之福繞 大悲大願 大聖大慈 東極至尊大帝 青華主宰高虛無上 六宸衍慶延生益祿天尊

三十五、西斗寶誥

志心皈命禮

歷應丹元 雲齊素照 昭瑞彩而帝座分符 會青微而天街懸象 躔留合璧 司東井石液之權 退守分衡 掌南陸上垣之令 遵七紀以行關 約四時而承化 大悲大願 大聖大慈 西竺洞陰大帝 光明星主集慶真皇 特玄體道天尊

三十六、中斗寶誥

志心皈命禮

位處中央 總領四方 端居靜密 開列混茫 四極輔翼 大赫丕光 七政璿璣 兩曜伏襄 統攝萬象 提振紀綱 嚴校諸天 無極神鄉 成始成終 造化之源 聖中之聖 靈中之靈 包羅無數 含養眾生 大悲大願 大聖大慈 大魁星君穹蒼至真上帝中靈無極天尊

三十七、中壇寶誥

志心皈命禮

興周聖將 滅紂先鋒 金光洞裡練金光 玉虛奉命降陳塘 左執金圈 右執尖槍 足踏兩輪 日火日風 驅妖滅怪斬魔王 親歷一千七百浩劫 而圓道果 破盡三萬八千惡陣 永鎮天宮 一朵蓮花 化成莊嚴妙相 十方世界 廣濟救苦慈航 玄功深奧 變化無窮 得道升天轉眼中 臨敵無懼 威武堂堂 大忠大孝 至勇至剛 安民護國 中壇元帥天尊

三十八、天妃寶誥

志心皈命禮

浦陀勝境 興化涓州 靈應威德 非常孝感 神通廣大 救厄而平波息浪 扶危而起死迴生 大慈大悲 救苦救難 敕封護國庇民 明著妙靈昭應 弘仁普濟天妃 加封 天上聖母太極元君

三十九、城隍寶誥

志心皈命禮

社稷古公 天下正神 銓福國顯忠之行 稟賞善罰惡之仁 都邑之主 諸郡侍從 所隸十三布政 案判一十八司 廟社萬年 恩扶億劫 設作福作威之柄 造注生注死之權 運神力以護鄧川 遇陰兵而驅夷寇 至靈至聖 乃正乃公 護國保寧 佑聖王 威靈公 感應尊神

四十、道濟師尊寶誥

志心歸命禮

功高東土 果證西天 靈由羅漢而進菩提 修空五蘊 斷盡六根 僧中稱聖 玄功絕倫 道自先天而傳後世 棄李門之富貴 衛宋室之江山 道伏天魔外道 禪參玉版金剛 百衲袈裟 清風滿袖 雙拖草履 道炁盈身 抱慈悲而濟困 行方便而扶危 靈隱寺中留聖跡 天台山上話禪機 法輪常轉 廣佈慈雲 大悲大願 大聖大慈 南屏帝主 普濟度世 靈隱道濟天尊

四十一、東嶽寶誥

志心皈命禮

赫赫玄英之祖 金輪少海之宗 彌仙母夢日光生 紫府聖人東華弟 昔建功於長白 始受封於羲皇 初號泰華真人 漢明泰山元帥 唐會崇恩聖帝 聖朝敕字上主 位鎮坤維 功參乾造 仁以德仁 回陽手於掌上 聖心益聖 麗日月於天中 五嶽稱讚於東方 三界獨尊於中界 仰奉行於大道 俯糾察於陰司 掌人間善惡之權 字天下死生之柄 懲姦惡而獄分三十六主 司吉凶而案判七十二曹 行善者注生天堂 沉迷者尋聲救度 示慈尊垂慈之相 開眾生生化之門 福與天齊 功高無量 大悲大願 大聖大慈 中界至尊 東嶽聖帝慈光救苦威權自在天尊

四十二、東嶽皇后寶誥

志心皈命禮

乾元配位 坤德合形 淋氣明明 婉春融於三界 德慈育育 澄秋明於萬方 與聖同明 普天共仰 大慈大惠 大淋大明 東嶽正宮淑明坤德皇后

四十三、東嶽上相寶誥

志心皈命禮

職負天齊 股肱仁聖 布青陽之號令 掌泰岱之權衡 黼黻斯文 列嶽庭之上相 宣揚帝德 司塵世之下民 稟公忠正直之心 察善惡姦邪之事 大悲大願 大智大聰
東嶽上相司命鎮國真君

四十四、東嶽太子寶誥

志心皈命禮

靈分三炁 質託九陽 木火相生 乃化成於本始 乾坤配位 育秀氣於靈根 體性炎炎 降福降祥降福祉 正心耿耿
廣文廣武廣仁慈 遵父威權 體天行道 大悲大願 大孝大仁
東嶽上殿太子至聖炳靈王尊神

四十五、碧霞元君寶誥

志心皈命禮

泰山頂上 東嶽內宮 曩時現玉女之身 根本即帝真之相 應九炁而垂慈示相 冠百靈而智惠圓融 行滿十方 恩周億劫
位正天仙之號 冊顯碧霞之封 掌嶽府之神兵 管人間之善惡 尋聲赴感 護國安民 大聖大慈 至仁至孝 天仙玉女 廣靈慈惠
恭順普濟 保生真人
護國庇民宏德碧霞元君

四十六、嶽府增福略福二司寶誥

志心皈命禮

唯二神真 乃一統屬 善膺其福賜金珠 書略福之篇 忠註其祥加厚祿 集增福之字 丹篇紀善 玉府登庸 大悲大願 大聖大慈
嶽府掌增福略福之神

四十七、九天監生大神、九天衛房聖母寶誥

志心皈命禮

東嶽子孫案 九天監生司 結秀成胎 稟兩儀之造化 送生保產 乃二聖之綱維 變理陰陽 散行痘疹 九天稱慶 一視同仁
大悲大願 大聖大慈
普濟普度九天監生明素真君
多男多女九天衛房聖母元君

四十八、嶽府忠祐真君寶誥

志心皈命禮

本生閩地 立業南方 學道問道 授親傳於五祖 求仙得仙 使草人於三耕 護聖駕於揚子江心 顯神通於明君舡上 威名昭著
聖德難量 大悲大願 大忠大勤
江東忠祐崇惠之神

四十九、嶽府朱太保、統兵元帥寶誥

志心皈命禮

嶽庭猛將 都副統兵 朱髮青顏 冠三山之鐵帽 皂袍束帶 提九節之鋼鞭 攝魄追魂 捉生落死 掌善罰惡 察過糾非 大悲大願
大顯大靈
嶽府顯應太保攝魂朱將軍
都副統兵大元帥

五十、嶽府曹僚寶誥

志心皈命禮

七十五司案 東廊西廡神 十大太保 聽令於殿前 龍虎神君 鎮護於左右 速報見報 分善惡於兩途 陽曹陰曹 判儒釋之三教
註宰官將相之功勳 斷生老病死之苦趣 人鬼精邪之異類 胎卵濕化之生靈 事事悉歸於案牒 般般各屬於冥官 考對無停
詮量不息 大悲大願 大寬大仁
嶽庭州職曹僚 岱嶽諸司官典

五十一、呂祖寶誥 (二)

志心皈命禮

唐朝得道 宋室開玄 拜正陽而上輔玉皇 賜寶劍而下降妖怪 遍現十方行大化 默遊三界救群生 總督九關傳玉旨
護持三界闡金綸 九皇贊仰煉雲砂 中天職理參辰曜 龍沙會上號玄師 紫府宮中居法位 宏誓未完 此心不泯 方方垂訓
處處顯神 大聖大慈 大仁大孝 敕封三十三天 大法宮中 金蓮臺上 代天宣化 統領眾生 扶正正陽 總督關教 華蓋掌道大士
警化孚佑上帝 純陽呂祖天師 親身救劫誓願度人真廣慈尊

五十二、呂祖寶誥 (三)

志心皈命禮

蕭宇玄臣 香林仙宰 道冠八洞金函 職奉三清玉敕 冰壺煉炁 結祥靄於太乙之扉 星劍騰輝 印寶光於上樞之殿
綸巾貫巽德之風 羽袖本乾元之體 採雲芝 化金龍於玄鼎 成霧柳 變玉虎於瓊瑤 神貫日烏 氣吐丹虹 萬里精凝 月兔光開
珠露千霄 醉鶴垂綸 法振五雷 號令飛鸞 執拂身為三界網維 慧力開玄 威風攝崇 大聖大慈 大仁大孝 玉清協化 紫洞持宗
天曹逸史 瑤池較籙 西竺明玄 北極梵宰 三界行人 六府選仙 靈通肇化 玄都孚佑帝君
純陽演正興行持劫妙道濟世天尊

五十三、呂祖寶誥 (四)

志心皈命禮

虛微玄奧 靜化幽冥 演無上之玄元 消萬劫之罪果 降魔度世 立道超迷 功高上洞之雷司 德庇人天之世界 大慈大化
大願大尊 隱顯萬方 逍遙億國 與天地之體 共日月之照 掌三十六極之仙銜 管七百八界之神冊 立洪洪大志 度億億凡生
最高最上 廣化廣仁 玄玄應化 功高普度 億感大成 萬正紫極真人 垂慈接教 伏邪警世帝君
興行妙道天尊

五十四、歲君寶誥

志心皈命禮

天潢帝胄 斗極魁罡 系根甲乙之鄉 調燮丙丁之政 積功於皇英十世 證道於金粒一朝 移孝作忠 備極慈祥之澤 代天育物
常孚請禱之殷 三頭應運顯神通 六臂垂威徵梵力 轄六十甲子之官君 周三十二天之躔度 無願弗從 有求斯應 消災解厄
洗罪延生 大悲大願 至威至仁 皇英歲主 佐理瑤天 斗口協輔大元帥 靈華青帝至德星君

五十五、葛祖寶誥

志心皈命禮

天台得道 閻皂成真 昔受東華 復傳西蜀 詔命玉京金闕 位證太極仙班 慈憐拯拔於沉淪 恩念普資於苦爽
葛天氏遺風顯著 勾漏令丹砂俱存 括蒼任遊 羅浮乃止 脩閱玉笥 修理金書 大悲大願 大聖大慈 太上玉京 東吳太極仙翁
雷霆玄省 天機內相 玉虛紫靈 普化玄靜 常道沖應 孚佑真君 垂恩廣教 慈悲大帝
度人無量天尊

五十六、許祖寶誥

志心皈命禮

混元始祖 一炁分真 多劫之前 積修至道 勤苦備悉 經緯逾深 萬法千門 罔不斯歷 救災拔難 除害蕩妖 功濟生靈
名高玉籍 眾真推仰 宜有甄陞 大悲大願 大孝大仁 九州都仙太史 高明大使 雷霆奉省 天樞伏魔上相 至道玄應 神功妙濟
掌九天司職 太乙定命 注生真君 三天按察都檢校 普奏諫議大夫 天醫大帝 度人祖師
淨明普化天尊

五十七、丘祖寶誥

志心皈命禮

甯海從真 龍門啟派 修苦行於三千 立玄綱於百世 嘉謨入告 盡覺後之金針 遺集垂科 乃通玄之玉液 長陽消陰 生水濟火
道高重於金元 仙跡留於蜀隴 卓哉仙品 偉矣宏仁 大悲大願 大聖大慈 三天翼教 承先啟後宗師 接引大使 虎符領道大夫
雷霆行省 通明上相 宣德行化真君 通權達變 和惠大帝
全真演教天尊

五十八、斗姥寶誥

志心皈命禮

西天竺國 大智光中 真空妙相法王師 無上玄元天母主 金光爍處 日月潛輝 寶杵旋時 鬼神失色 顯靈蹤於塵世
衛聖駕於閻浮 眾生有難若稱名 大士尋聲來救苦 大悲大願 大聖大慈
聖德巨光天后摩利支天大聖圓明道姥天尊

五十九、玉清寶誥 (二)

志心皈命禮

玉清聖境 清微天宮 鬱羅蕭臺之中 森羅淨泓之上 現有為之梵相 具無極之神通 敷演真玄 破無有色空之礙 拯提趣類
絕智愚高下之分 妙用難窺 靈機罔測 大悲大願 大聖大慈 無量度人
元始天尊

六十、上清寶誥 (二)

志心皈命禮

上清真境 禹餘天宮 巍巍瓊臺之中 玄都玉京之上 接元始虛皇之統系 超西那玉國之根苗 入黍米珠 盡挹真玄之精粹 在香林苑 屢談秘要之筌蹄 妙德難思 神通莫議 大悲大願 大聖大慈 無量度人 靈寶天尊

六十一、太清寶誥 (二)

志心皈命禮

太清仙境 大赤天宮 巍巍金闕之高 渺渺瓊霄之上 降生於無量數劫 說法於萬二千天 五千秘言 融三才之妙道 八十餘度 接六趣之眾生 聖德崇高 玄功廣博 大悲大願 大聖大慈 無量度人 降生天尊

六十二、玉皇聖父寶誥

志心皈命禮

妙有真境 彌羅上宮 曩示現國王之身 即根本帝尊之質 始相湛寂 實至玄至妙以難言 嗣位繼傳 妙無等無倫而相踵 聖父之慈悲父 至尊之最上尊 稱讚難窮 皈依莫盡 大悲大願 大聖大慈 光嚴妙樂國王聖父天尊

六十三、玉皇聖母寶誥

志心皈命禮

妙有真境 彌羅內宮 慈顏烜春日之和 懿範凜秋霜之肅 純全梵炁 先天地以素存 化現妙身 歷后妃而示應 具一炁胚胎之始 寓帝身生化之殊 萬化祖根 眾生慈母 大悲大願 大聖大慈 寶月光皇后聖母元君

六十四、孔雀明王寶誥

志心皈命禮

彌羅內境 圓相開明 瑞炁烜先天之祖母 慈光示釋教之宗師 駕孔雀之靈現 乘鸞鳳之顯應 演真經皈告於天王 談道昔從於上帝 誓願度人 慈濟無邊 眾生有難若稱名 普護無窮而拯拔 救護群品 皈依莫盡 大悲大願 大聖大慈 釋天教主 孔雀明王大天尊聖母元君

六十五、玉皇寶誥 (二)

志心皈命禮

紫金金闕 白玉玉京 住妙有之境中 處玄真之天上 功圓道備 放妙相卓冠於諸天 心廣體胖 故慈光遍燭於三界 位尊而上極無上 道妙而玄之又玄 真聖宗師 天人依仗 大悲大願 大聖大慈 穹蒼聖主玉皇天尊

六十六、玉皇寶誥 (三)

志心皈命禮

光嚴國內 妙樂土中 聖母凝神 夢於虛無 道君授玉質於恍惚 慈愛和遜 弗貪萬乘之尊榮 忍辱仁柔 不憚億劫之修累 功高無比 德重難踰 大悲大願 大聖大慈 現無量功德之身玉皇天尊

六十七、玉皇寶誥 (四)

志心皈命禮

尊居帝位 高處天宮 遍遊於一切白玉京中 普現於十方黃金闕內 定而能應 去來自在以無拘 合而可分 變化圓通而莫測 演清靜解脫之道 濟沈迷憂苦之徒 自然而然 非識可識 大悲大願 大聖大慈 現清靜自然之身玉皇天尊

六十八、玉皇寶誥 (五)

志心皈命禮

昔為王嗣 苦建玄功 三千餘劫之脩行 有如一日 億萬生靈之拯度 廣及十方 雖法身由胎藏之胚臍 諒聖體由道源之變化 不壞不滅 杳亡杳存 大悲大願 大聖大慈 現神明堅固不壞真空無上法身玉皇天尊

六十九、玉皇寶誥（六）

志心皈命禮

清微天上 太玄玉都 知時至而舉六神通 分法身而遍十方界 如無邊境 上天下地悉昭融 出大妙音 六道四生皆解脫
表以放光之瑞相 明茲本行之勝因 蕩蕩難名 巍巍無上 大悲大願 大聖大慈
分身應化玉皇天尊

七十、玉皇寶誥（七）

志心皈命禮

北極真空 尊居無上 本行皆難行之苦行 是身即清淨之道身 棄國出家 施財寶而捨血肉 濟幽及顯 宣正化而揚神功
教菩薩而悟大乘 證金仙而入妙道 為慈悲父 誠大丈夫 大悲大願 大聖大慈 玉帝應身
清淨自然覺王如來

七十一、高虛清明天主寶誥

志心皈命禮

與諸眷屬 馭八景輿 雖後會於法筵 實首陳於偈讚 花成寶蓋 悉歸美於帝光 樂奏洞章 欲溥沾於聖澤 門五品而先一品
居九天之第八天 啟白元尊 稱揚上帝 大悲大願 大聖大慈 經筵啟問
高虛清明天主帝君

七十二、昊天上帝寶誥

志心皈命禮

玉光境內 寶蓋會中 感上帝開利益之門 為眾生興方便之意 周流沙界 受真經而五品以誦持 親奉玉音 敕三界十方而覆護
以孝養恭敬而為本 則自在逍遙而無疑 亶亶歌辭 巍巍功德 大悲大願 大聖大慈
經筵啟問昊天上帝

七十三、四眾八部金仙寶誥

志心皈命禮

寶蓋會中 玉光境內 從下方而來觀 知至理之本同 飛八湊香而旋繞道前 雨眾妙花而遍覆會上 護諸國土 冀妙法之福舍靈
具六神通 衛真經而遵敕命 終篇獻頌 億劫長存 大悲大願 大聖大慈
四眾八部大乘菩薩梵天一切金仙

七十四、救苦寶誥（二）

志心皈命禮

青華聖境 東極上宮 十方化號度群生 百億瑞光瞻妙相 即隨機而赴感 由誓願之弘深 九色蓮花 作慈航之彼岸 一枝楊柳
開甘露之法門 無量度人 大慈仁者 大悲大願 大聖大慈
太乙救苦天尊

七十五、留侯寶誥

志心皈命禮

家世相韓 股肱佐漢 身不勞於汗馬 名已在於丹書 掉三寸舌 為帝者師 受一編書 作人中傑 進黃石公履 由志合以道同
從赤精子遊 遂功成而身退 玉經謔證 實節疏瑩 大悲大願 大聖大慈 校經主宰 天樞上相
法主道君天尊

七十六、玄帝寶誥（二）

志心皈命禮

北方淨域 玄武奧樞 始從金闕以化身 終輔玉皇而斷惡 修真學道 功成於四十二年 拯濟世人 澤波於千萬億劫 有求皆應
無願不從 威德剋比於乾坤 道力弘深於海嶽 功過必察 賞罰無逃 大悲大願 大聖大慈 北極真武佑聖真君 玉虛師相
玄天上帝
終劫濟苦天尊

七十七、祖師寶誥

志心皈命禮

清微天上 寶蓋會中 常面覩於慈光 亦親聆於妙法 以本行之經教 萬代流傳 俾後世之民生 一忱受誦 惟聖聖相承之師匠
使源源不絕於人天 大悲大願 大聖大慈
傳經演教歷代祖師神仙聖眾

七十八、明王經聖眾寶誥

志心皈命禮

寶蓋會中 玉光境內 奉上帝之敕命 作三界之慈航 幹運四時 主張造化 覆護受持 是諸經者 滿足所欲 如是願心 十方帝君 神仙兵馬 十極神王 二曜九星 三官四聖 五方星斗 四天門王 周天星眾 二十八宿 降魔金剛力士 飛天神王 四海九江 五嶽四瀆 山林川澤 井泉溝渠 十二河源 龍王龍女 羅叉摩耶 諸大天王 孔雀能仁一切主者 法錄吏兵 城隍社令 樹木神眾 土地靈官 護戒護壇護經護道 經筵有感一切真仙

七十九、鍾祖寶誥

志心皈命禮

黃芽得道 白雪成真 配水火於一炁之中 運陰陽於三華之頂 無無虛寂 渺渺凝玄 胎息刀圭 孰悟本來之體 嬰兒姪女 誰知靈府之臺 度眾生於慾海之波 錫蕊珠於雲霄之表 洪願不窮 好生常念 大悲大願 大聖大慈 東華洞天帝主 鍾離妙道真人 超登蓮花天尊

八十、李祖寶誥

志心皈命禮

西周學道 晉士成真 常住世以無為 好煉神而出定 太上之授受居多 宛邱之磋磨不少 無滯著相 慧解偏深 質外尋求 高超塵劫 金剛不壞之身 縹緲清虛之體 異相金仙 傳玄道祖 大悲大願 大聖大慈 西華洞天教主 煉神超劫天尊

八十一、張祖寶誥

志心皈命禮

鶴髮童顏叟 長生不老仙 恆州寄跡 往來汾晉之間 秦政亂平 養息嵩華之穴 坐騎之變幻偏奇 齒落之重生更異 太宗高宗 徒切白駒之慕 百歲千歲 嚆知年數之長 佯卒於妒女廟前 欺武實所以拒偽 樂素於集賢院內 談道總有以開君 號錫明延 冠衝斗酒 大悲大願 大聖大慈 中條洞天帝主 通玄應變天尊

八十二、韓祖寶誥

志心皈命禮

三天教主 八洞飛仙 弱冠矢彌羅之願 終南受道德之經 撥火栽蓮 顯驚人之妙術 臨風弄笛 譜慨世之幽思 度阿叔於藍關道上 成孝即所以成忠 屏美色於卓韋菴前 守性不外夫守己 超五百年未了之劫 法治天人 廣億萬眾無量之生 心同鍾呂 大悲大願 至聖至慈 瑤華洞天帝主 圓通早覺天尊

八十三、何祖寶誥

志心皈命禮

增城鍾異 楚水流芳 守十年未字之貞 葆七世童真之體 仙桃授而辟穀 歲未及笄 雲母餐而飛行 步如有鶴 拒偽周之宣召 注念貞觀 顯天寶之神奇 香生石室 月姊愛與縫裳 麻姑進而酌酒 三醉瑤池 不失容於王母 六毫頂放 本應瑞於何家 丈夫之氣概偉然 巾幗之鉛華全易 白璧無瑕 金華膺寵 大悲大願 至孝至慈 青霞洞天仙 宏慈妙法元君

八十四、藍祖寶誥

志心皈命禮

三天承道法 風流自在仙 混跡人寰 嚆識魚龍之別 浪歌塵市 孰知春雪之詞 灑墨汁以成花 蓮開五色 提懿筐而示象 鶴載千葩 曩無餘賞 悉周貧乏 板能振響 動醒王侯 不衫不履之粧 至化至神之詣 普度群生 廣修億劫 大悲大願 大聖大慈 萬華洞天帝主 流光耀采天尊

八十五、曹祖寶誥

志心皈命禮

簪纓嗜道 貴戚修仙 性天時葆其真元 寵眷弗移其素志 鑑弟車之覆 銳意入山 悟舟子之談 悉心辦道 在國會多樹議 總無為清靜之謨 遇仙略叩玄機 盡見性明心之語 倜然野服以葛巾 澹然食貧而茹苦 空虛自在 瀟灑高狃 大悲大願 大聖大慈 黃華洞天帝主 超凡入聖天尊

Edited 2 time(s). Last edit at 01/27/2013 09:44PM by gustav.
